


Na Haora Tareranui i homai tenei whakapapa:—



He tuahine a Titia ki a Te Rohu.

(Ref: J. 13 21, W. 5 58, T. Turi p. 55.)

Tu tonu ko te rae, e, i haere ai te makau.  
 E kai ana au, e, i te ika wareware.  
 E aurere noa, e, i te ihu o te waka.  
 E kore hoki au, e, e mihi ki a koe;  
 E mihi ana au, e, ki a Ngahua,<sup>1</sup> te hoa;  
 Taku kahui tara, e, no roto i au;  
 Taku totara haemata, e, no roto no Moehau.  
 I haere te makau, e, i te ara kohuru;  
 Kihai i tangohia, e, i te mata rakau.  
 To toto<sup>2</sup> ka tuhi, e, ka rarapa i te rangi.  
 Totohu<sup>3</sup> to hinu, e, nga one tu atua  
 I raro<sup>4</sup> i Te Karaka,<sup>5</sup> e, i te hau kainga.  
 Ka noho mai koe ra te puke i Rangipo.<sup>6</sup>  
 Ka whakawai mate ra te wahine 'Ati-Puhi.  
 Kauaka e koaia, e, he ngahoa<sup>7</sup> toki nui.  
 Ko wai tou, e, hei ranga i te mate?  
 Ma Rohu-a-Whiu,<sup>8</sup> e, mana e homai.  
 Tau noa te makau, e, he huia rere tonga;  
 He unuhanga taniwha, e, tere ana ki te muri i.

<sup>1</sup>Ngahua, te hoa.—Kei te J. 13/21 e penei ana, 'Ngahua, te ipo.'

<sup>2</sup>To toto.—Kaore tenei rarangi i roto i te J. 13/21.

<sup>3</sup>Totohu.—Kei te J. 13/21 e penei ana:—  
Totohu to hinu, e, nga one hungahunga.

<sup>4</sup>I raro.—Kei te J. 13/21 e penei ana:—'I waho.'

<sup>5</sup>Te Karaka.—Kei Pikiparia; i taona ki reira a Te Maunu. Kei muri  
i te rarangi e whakahua ra ki Te Karaka ko tenei ki te J.  
13/21:—

To uru i piua, e, ki te wai ngarahua.  
E ki ana a Haora Tareranui kaore i tika.

<sup>6</sup>Rangipo.—He puke kei Pikiparia. I haria te panepane o Te Maunu  
ki reira whakamokamokai ai.

<sup>7</sup>Ngahoa.—Ki te J. 13/21 e penei ana, 'ngawha.'

<sup>8</sup>Rohu-a-Whiu.—Ko Te Rohu.